

## Zems Zems-qa pepa

### *Megeat Manqat-qase*

Nqanek pepa, Zems ndøpeawám. Ngenek Yesugé eveqasé. Ndego Zelusalem Klisten bawan ezoqam-gé megeat ezoqam ndøgoám. Ndego nqanek pepa ti-te ndigu tenø-peawám, Zu Klisten ezoqam, manqeи vinivinimba-te gipanqanim neka ndøgo vøyageapam.

Teqa pepa mokho-te, Zems ezoqa áv gene-guguzá nqægø: Ndigu matev eqeieqeit té giabeyagé, neka tiqa unimanqatin matev, kopømba mbaín, manqat mba tøgoat, geté matev matanamus begó.

<sup>1</sup> No Zéms, nqanek pepa nqæpeaomit. No Mbumbukiam neka Evezøza Yesu Keliso, tigí sasae ezoqám.

Nqanek pepa zo-té qatø-peaomít, zo Izlael khagua bawan tuelv ezoqam, manqeи vinivinimba qazo-panqanim.

Khaiya mbomá, zo-te.

*Khamasim matev tøni-fakhanam, yaq niqa unimanqatin matev ginimbi-khouwév*

<sup>2</sup> Nøfuap! Zo khamasim matev vinivinimba tøzø-fakhanam, zo khanakhanakh mba bezø-asøtøvé. <sup>3</sup> Zapa ndøgo, zo møzøte-zøtéz, matev vinivinimba, zoqa unimanqatin matev

---

**1:1** 1:1 Met 13:55; Gal 1:19; Kel 15:13; 1 Pita 1:1      **1:2** 1:2 Lom 5:3-5      **1:3** 1:3 1 Pita 1:7

tækhamasimit, yaq bazaføgakh-us waniap matev zømbé-fakhán. <sup>4</sup> Yaq ta bazaføgakh-us waniap matev ndøgo, até bezøgó, atema vaev-te. Yaq zo uni zøtéfisám neka matev eqeieqei matanam-te zówafezák.

<sup>5</sup> Geté zo mokho-te, ezoqa nøme matavap loloakh mbain tøgoat, ndego Mbumbukiam-té geabenøviám. Ndego gèmbøe-khaneát, ezoqa ewaqape matev mbomømboma tezø-etoam. Ndego geqá-ponqomák, toqombo-viam, geté matavap loloakh segeqá-etoám. <sup>6</sup> Geté gekha ezoqám ndego, Mbumbukiam temboviam, ndego ùni bete-unimanqatín. Betonàké. Zapa ndøgo, ezoqam ndego, ndo:nake, ndego andé ndaola khamøe me me:-asøtavé. Khamøe tøndo-fegimat, tøvumøet, segé-khaonimát. Kopømba mbaín, ndaføyamba te-itán. <sup>7</sup> Ezoqam av nge:go, bematàváp, av nqægo, Evezøza-te matev eqeieqei kopo ndondáp. <sup>8</sup> Ezoqam av ngenek nge:go, matavap menas-té geyá. Teqa yage-te ate ndægo, ndego bazaføgakh-us geyayák.

### *Gigiap-av ezoqam neka gigiap kopoav ezoqam-qayaq-te*

<sup>9</sup> Klisten ezoqam ndego, gigiap-av neka iz mbain ndego, ndego khanakhanakh mbá geabetegó. Zapa ndøgo, Mbumbukiam iz kandambaqape mbo-etoám. <sup>10</sup> Geté gigiap kopoav ezoqam, áv geabete-mataváp: Mbumbukiam-qa bøi-te, teqa gigiap kopoav, gigiap-qapé mbá. Teqa gigiap andé flawas me mé:khataeztét, vø-o:āz. <sup>11</sup> Ni mizi:nøtén. Khøuwa bazaføgakh-us tesasev, yaq

gagayag gétá, flawas manqe-i-te vø-o:āz. Yaq tiqa bugug mbomømboma segé-soqá. Yaq até gi-giap kopoav ezoqám-a, ndego bazaføgakh-us ndesasaeat, segemø-navøém.

*Mbumbukiam-te, matev mbomømboma mba ndo-okhó*

<sup>12</sup> Ezoqam khanakhanakh mbá geabetegó, ndego bazaføgakh-us teyat, khamasim matev tømbo-fakhanumat. Ndego bazaføgakh-us teyat, yaq-fia khandi miavmiav ndóndáp. Ta khandi miavmiav-qa yaq-te, Mbumbukiam manqa mbusa, áv genevé nqægo: Ezoqa ndígu tíndapém, te-te kuku ndøzøgo.

<sup>13</sup> Ezoqam ndego, manqa-zapa tækhamas, ndego bemanqåtē, av nqægo, nqanek khamasim matev Mbumbukiam-tē qando-okhó. Zapa ndøgo,

manqa-zapa, kopømba mbaín, Mbumbukiam khamasim-te tøve, neka até Mbumbukiam ekezán-a, ndego ezoqa khamasim-te abumáv, manqa-zapa-te ti-o:az. <sup>14</sup> Geté ezoqa ewaqape, ekeza kha-qá poev ndø-abumatún, khamasim matev-te. Ndøgo tø-itubín neka vøtakhasin.

<sup>15</sup> Yaq ndigu, kha, poev matev soqøsoqa-te, sa tingonqotavat, yaq manqa-zapazapa zøfakhanát. Ndøgo andé poev matev soqøsoqa-gí nakheiś. Yaq manqa-zapazapa qakhouwevin, løvøte ndøfakhanín.

<sup>16</sup> Nøfuap mbomømboma! Zo ezoqa betùbám.

<sup>17</sup> Yan-te nqo:go, matev mbomømboma neka ndaføya-ndaføya mba ndo-okhó. Mbumbukiam-té qando-visín, ndego yan-qa waev vinivinimba gekhakheinam. Ta waev ndøgo, sège-enendát, vø-khouiat, neka nango vøkhayat. Geté

Mbumbukiam gé-enendák. **18** Mbumbukiam āv qambøe-pøovám nqægo: Ni teqa unimanqatin manqat mokho-te, khandi ndakinak zíndapém. Tene-matanám ndøgo: Ni gigiap ate nqægo mokho-te, ndego gekhakheinam, tegi bizigú. Ate av-té, gigiap ndøgo, toqope:tat, bugukhokhof gigiap teqa ndøgo.

*Mbumbukiam-qa Manqat vømbopdøev, sa ndøyøgē*

**19** Nogi nøfuap mbomømboma! Zo vøezøtéz. Ezoqa ewaqape, nakhamas-te, manqa yoge matev bezøgó. Geté manqa manqate-te neka qaqa-te, aiyáv qabezøgó. **20** Zapa ndøgo, ezoqam qaqa tegoat, ndego kopømba mbaín, matev tegoat, av Mbumbukiam ndømbøe-pøev. **21** Yaq nakémbá, matev soqøsoqa ate ndægo neka manqa-zapazapa ndøgo, zo mokho-te sekemba ndøugu, vø-ivøvém. Zo Mbumbukiam-qá mokho-té qanu:gú neka teqa manqat vø-upøgim, ndego zo mokho-te, ande avøe gigiap me, ge-ogeakh. Teqa manqat kopømbaqapé, zo segé-khandí:z.

**22** Mbumbukiam-qa Manqat, o-mba mbøendapé. Sa ndøyøgē. Zo sa tozo-ewagat, zøkeza kha zombøé-khavozumít. **23** Gekha ezoqām ndego, manqat sa te-ewagat, gete paeveav vøgoät, ndego kopømba ande av ndé:go, ekeza bugug glas-te geqeiv. **24** Geté nqawa gewav, bugug ndøgo geqeiv, nakhamas-té qambøe-navøém. **25** Geté gekha ezoqām ndego, Mbumbukiam-qa guguna

**1:18** 1:18 Zion 1:13    **1:20** 1:20 Eccl 7:9    **1:21** 1:21 Kol 3:8;

1 Pita 2:1    **1:22** 1:22 Met 7:26; Lom 2:13    **1:25** 1:25 Lom 8:2;

Zems 2:12

manqat ndaføyamba-qape mokho-te ndu:qeivi, ndøgo ezoqa nqa-nqovotøzat, neka ta guguna manqat mokho-te, oskia teyagat, neka manqa matev navøepøteav vøgoät, gete tembopavat, ndego khanakhanakh ndøgoät. Gekha matēv ndøgo, tematønumat, Mbumbukiam gembó-tøkeát.

<sup>26</sup> Gekha ezoqám ndego, ekeza kha Klisten ezoqam nde:vewe, gete ekeza tou keoge eqeieqeí mbain vøgoät, ndego ekeza kha, gèmbøe-khavozumít. Teqa unimanqatin matev neka guliguli matev, mokho mbaín. <sup>27</sup> Unimanqatin neka guliguli matev, av Mbumbukiam, nigi Tat, eqeieqeí neka ndaføyamba-qape nde:vewe, nqánek: Loundik nakheis neka ngængæm, tiqa potonam matev-te, zizø-tøkeát, neka manqeí-qape-qa matev sa zimbó-takaták, manqa-zapa-te tø-itumbat.

## 2

### *Ni ezoqa ewaqape-te, kuku binigú*

<sup>1</sup> Nøfuap! Zo Evezøza ndozo-unimanqatinat, ndego Yesu Keliso, ndego Mbumbukiam-qa waev-te ndeyage, zo yaq-mba ndø-økhö. <sup>2</sup> Khamasim, ezoqa zoqa móvøza-te tendowav, yaq ndego tendo-khakheinam, ndabua eqeieqeí vøndó-uzäm neka kokosov-te gol gigiap fia kandakanda vøndó-utáz, neka até gigiap-av ezoqám-a, vøndówäv, ndego ndabua soqøsoqa tendo-uzam; av tægoat ndægo, yaq matev eqeieqeí ákhanégo? <sup>3</sup> Zo ndego ezoqam tozombo-vizumem, ndego ndabua eqeieqeí te-uzupat neka vozombó-einím, “Qonam

nonqo qanimav-te nqanek, qonøqōm,” geté gigiap-av ezoqam tozombo-einim, “Soqoyāt nandav,” o “Manqeitē qanøqōm, nqanek noqa zenda tokhotapak-te.”<sup>4</sup> Gê, av tøzøte-gonem, eqeieqeī? Av taoká. Zo zðqatatét, zo mokho-te. Neka matavap soqøsoqá qazøte-gevezoát.

<sup>5</sup> Nogi nøfuap mbomømboma! Zøtøndé-yogēm. Mbumbukiam ndígu tevevesám, ndigu manqeiqape-qa bøi-te gigiap-av ezoqam ndigu, yaq ndigu tiqa unimanqatin matev mokho-te, vømø-ande-gigiap-kopoav-ezoqam-ez, neka ndigu Mbumbukiam-qa Megeat Matev-te vømø-ōz, av ndigu manqa mbusa gezømbeve, ndigu Mbumbukiam-te kuku ndøzøgo. <sup>6</sup> Geté zo, zo gigiap-av ezoqam mivi matev zozø-etoumatún, neka khokho ezoqam ndøzøtē-zæzā. Gèmbo-mataváp. Gekha ezoqâm, zo ndingiæzoat, neka manqa ovøyam-te ndi-abam? Ezoqam ndígu, gigiap kopoav ezoqam. <sup>7</sup> Neka ezoqam ndígu, Yesu Keliso, zo tegi ndozogo, teqa iz qanimav-qape ndingenøiwat.

<sup>8</sup> Zo nigi Kawa ezoqam-qa guguna manqat tozombo-pavat, av nqægo, “Ezoqa nøme-te, kuku āv tabetaqambe:gō, av qakeza kha-te kuku ndaqambe:go,” av tøzøtegoat, zo matev eqeieqeī zómatønumát.<sup>9</sup> Geté zo yaq-mba tozø-okhoat, ezoqa nøme tozozø-vizupat, neka nøme vozó-sanqabāt, zo manqa-zapa zógoát. Yaq Mbumbukiam-qa guguna manqat, zo khafeap møkuiam ezoqam mé:zæbát. <sup>10</sup> Gekha ezoqâm

ndego, guguna manqat ndembopaev, gete manqat kopo tenqawa, ndego guguna manqat ate ndægo, sugumú-møkuiám. <sup>11</sup> Zapa ndøgo, Mbumbukiam, ndego ge-ein av nqægo, “Qo nøkenøkem matev ndøngi:wāt,” ndego até nqanek manqat nømē-a, vø-ein, “Qo ezoqa pakhapakha zøkhanèäm.” Yaq nakémbá, qo nøkenøkem matev ngi:wateav toqogoat, gete ezoqa pakhapakha toqokhana, yaq qo até moqo-khafeap-møkuiam-ezoqam-éq.

<sup>12</sup> Gèmbo-mataváp. Zo Mbumbukiam-qá manqa ovøyam-té qazomówán. Yaq ndego zo ãv tené-gevezó, av teqa guguna manqat ndæmanqate, ndøgo ni ndønqvondam. Yaq nakémbá, zoqa matev matanam neka manqa manqate, eqeieqeí sa bezøgó. <sup>13</sup> Zapa ndøgo, gekha ezoqām ndego, tanakh mbain ndego, yaq até Mbumbukiám-a, tanakh mbaín, te-te, teqa manqa ovøyam khøuwate. Geté gekha ezoqām ndego, tanakh ndømbogo, ndego kopømbaqapé, mø gégoák, manqa ovøyam matev-qa yaq-te.

*Unimanqatin matev neka matev matanam-qa yaq-te*

<sup>14</sup> Nøfuap! Ezoqa nøme temanqatat av nqægo, “No Yesu, nò-unimanqatinät,” gete ndego matev-qase matønumav tøgoat, yaq gê, gekha eqeieqeí mbógo? Gê, unimanqatin matev av nqægo, kopømbâ, tøkhandi:v? <sup>15</sup> Klisten ezoqa nøme, anganeam ò sævam, ndabua mbain tøgoat neka lou-qa tipotonumat, <sup>16</sup> yaq qo sa toqozø-ein, av

nqægo, “Eqeieqei soqōyagāt, ndabua voqó-ūz-a, lou voqólōg,” gete qo ndigu tøkeeav tøgoat, av gigiap-qa ndi:potonam, ndøgo áv khazømbé-tøkē? **17** Yaq matev até kopó, qo unimanqatin matev mba taqagoat, gete matev matanam mbaín, yaq qoqa unimanqatin matev, mokho mbaín. Ndøgo andé nanimát.

**18** Ezoqa nøme, áv gini-manqaté nqægo, “Ezoqa nøme ndigu, unimanqatin matev zøgó, geté nøme ndigu, matanam matev zøgó.” Ezoqa av ndi:manqate, no áv qazømbé-qavøiú nqægo, “Gê, qoqa unimanqatin matev áv khatéqeív, qo matev matanapøteav tøgoat? Geté noqa matev matanam mokho-te, no áv qatéqamákh nqægo: No unimanqatin matev, nqanøgó.” **19** Toqo-unimanqatin, av nqægo, Mbumbukiam kopo me:gō, qanimáv. Geté gèmbo-mataváp. Até nqova soqøsoqá-ya, áv tini-unimanqatinát. Neka ndigu møe kandambá te-te. Kha wageap-ús. **20** Qo kandaniap ezoqam. Gê, qo qeiviáv, av nqægo: Matev matanam mbain tøgoat, yaq unimanqatin matev, mokho mbaín.

**21** Gê, nigi atanakha-zapa Eibleem, Mbumbukiam-qa bøi-te áv kené-ndaføyamba-ev? Ndego teqa matev matanam mokho-té genø-ndaføyamba-év, ndego ekeza yo Aezek, Mbumbukiam-te etoam matev gone nonqo, lou-qase-te geve. **22** Qo áv qoteqeiví nqægo: Teqa unimanqatin matev neka matanam matev, kopømbá sugumu-sasaetám. Yaq matev ndøgo, gematanam, tø-unimanqatín ndøgo:

Ndego Mbumbukiam, ùnime:-unimanqatín.  
<sup>23</sup> Yaq av nqægo, Mbumbukiam-qa Manqat ndøgo, ndøpeawap, møndø-unimanqatín, qa-ein, “Eibleem Mbumbukiam, gè-unimanqatín. Yaq Mbumbukiam ndego ta zapaya ndøgo, ndaføyamba-qape me:veó.” Yaq Mbumbukiam ndego zifu-zifu-qa mbo-akhá. <sup>24</sup> Ndøgo ni ãv qani-nømendim nqægo: Ezoqa Mbumbukiam-qa bøi-te, matev matanam mokho-té ginø-ndaføyamba-éz, ambá av nqægo, unimanqatin-te mbā.

<sup>25</sup> Até Leiáb-a, mambe sëvam guyagam, ndugu Mbumbukiam-qa bøi-te, matev matanam mokho-té gunø-ndaføyamba-év, Izlael ezoqam-gi bøibøi-anim, khoev guzø-ein, yaq nakhoa vini-te vøkhofotaz, ndigu sasa ndøkhokhoz.

<sup>26</sup> Khatae nqova mbain tøgoat, ndøgo nanimát. Yaq até kopó, unimanqatin matev, matev matanapøteav tøgoat, ndøgo nanimát.

### 3

#### *Tou-qayaq-te*

<sup>1</sup> Nøfuap! Zoqa Klisten bawan mokho-te, nømendim ezoqam khabé me:khòuwéz. Zapa ndøgo, zo møzøte-zotéz. Ni Mbumbukiam-qa manqa ovøyam-te ndizi-waniap, ndego ni nømendim ezoqam unimé:-gevenó, ãv tiuká, ezoqa nøme ndigu.

<sup>2</sup> Ni ezoqa ewaqape, zibusøtumatún. Geté gekha ezoqám ndego, manqat soqa kopo einiav tøgoat, ndego møndømu-ndaføyamba-év. Ezoqam

av ngenek nge:go, até ekeza kha ate ndægó-a, kopømbaqapé, tenøzøgim.

<sup>3</sup> Hos, tuqa nøzøgim nonqo, auli gigiap-qase, manqa-nqa-te toqombo-sokhof, yaq kopømbaqapé, tuqa kha ate ndægo soqó-nøzøgím. <sup>4</sup> Neka nqáe! Até palai khaguá-ya, oskiá ndøgo, kandambaqape ndøgo, neka khamøe kandambaqape ndøsøkuzu, ndego nøzøgim ezoqam, nøzøgim nonqo khapelavøqasé genénøzá, ma manqeи ndømbøepøtot. <sup>5</sup> Yaq matev até kopó. Tou ndøgo, gigiap-qase khapémbá, niqa kha-te. Geté taqa matanam, kandambá tantáv. Nqáe! Wageap khapelavøqase, kopømbá, yaq leg-qape segéwagím. <sup>6</sup> Niqa tou, andé gøinám. Ndøgo gigiap khapémbá, nikeza kha-te. Geté ndøgo manqa-zapazapa vinivinimba ndøngazungazumatún. Kopoáv. Yaq kha ate ndægo, manqa-zapa sugumú-tønøemét. Yaq niqa yage ate ndægo, andé gøinam me sugumú-wageapét. Gøinam av nqægo, gøinam manqeи-té qando-okhó.

<sup>7</sup> Gekha søvakha gigiap lozokhák ndigu, ndiløvuvam neka ndivisigiap neka ibøkha-te ndiokho, ezoqa nanak zøgeagimín, vøvisizin. Ndøgo kopømbaqapé. <sup>8</sup> Geté tou ndøgo, ezoqa kopømba mbaín, nanak tembogea, vøvisíz. Ndøgo manqa-zapa-ús. Kopømba mbaín, toqo-khakhatam. Ndøgo andé mulømula soqaqapé. Ezoqa løvøte zó-etoám.

<sup>9</sup> Niqa tou, Evezøza-te neka Tat-te, ike mangat zi:manqatatún, neka ezoqam soqain-te vizl:abumatuñ, ndigu Mbumbukiam ande ekeza bugug me ge:khakheinøvem. <sup>10</sup> Tou kopo-te,

Mbumbukiam-te ike manqat ndøfakhanín neka ezoqa soqain-te abam manqat vøfakhanín. Nøfuap! Matev av nqægo, bøgð. <sup>11</sup> Gê, kea kumbutøve kopo-te, kopømbâ, ibøkha bæbæs neka ibøkha soqain sa tumu-fakhatat? Kopømba mbaín. <sup>12</sup> Nøfuap! Neka gê, fig tae-te, oliv nanga ndøviam? Neka waen tae-te, fig nanga ndøviam? Ndøgo ùnime:-kopømba-mbaín. Yaq até kea kumbutøve-té-a, leat-us tøgoat, kopømba mbaín, ibøkha bæbæs toqotakha.

*Matavap loloakh-qa yaq-te, Mbumbukiam-te ndøndo-okho*

<sup>13</sup> Gê, zo mokho-te, matavap loloakh neka zøtezat ezoqam tígu? Tigoat, yaq nandiv nqanek matev, ezoqa ekeza yage eqeieqeí neka matev eqeieqeí giabiti-zømesím. Ekeza kha voat-ús neka matavap loloakh-ús. <sup>14</sup> Geté zoqa mbøni mokho-te, ova matev tøzøgoat neka zøkeza kha mba vozóqeivát, yaq zo me:khambùváp, av nqægo, zo matavap loloakh ezoqám. Av tøzøtegoat, zo zøte-khavozumít neka zoqa manqat, unimanqatín mbá. <sup>15</sup> Matavap loloakh av nandægo, ambā Mbumbukiam-té qandō-okho. Ndøgo Nqova Mbomambaqape-qá mbá. Geté manqeí-qape-qá matév. Nqova soqaqape-té qando-okhó. <sup>16</sup> Ma ova matev neka qakeza kha qeivi mba matev ndøgo, até ponqombap matev neka manqa-zapazapa vinivinimba ate ndægó-a, ndøgó.

<sup>17</sup> Geté matavap loloakh, Mbumbukiam-te ndøndo-okho, áv qanegó nqægo: Bugukhokhof matavap eqeieqeí-ús. Yaq sambi-ús neka matev

aiyaiyav-te matanam-ús neka yoge eqeieqei-ús neka tanakh-matev-ús. Neka ndøgo mokho eqeieqei ndøfakhanín. Neka ndøgo ambá av nqægo, yaq-mba ndø-okhō. Neka taqa matanam, ambá av nqægo, ngusum-te eqeieqeī, getē mokho-te soqain. <sup>18</sup> Gekha ezoqām ndigu, sambi-te tiyagat neka sambi matev ande avøe gigiap me ti:-ogeakh, ndigu matev eqeieqei vinivinimba segezø-fakhanám.

## 4

### *Ni Mbumbukiam-qá mokho-té qabizu:gu*

<sup>1</sup> Gê, zo mokho-te nandav, manqa itumbam matev neka nøfeap matev, gekham-té qandóokho? Ndøgo zøkeza kha-qa poev matev-té qando-okhō, ndøgo zoqa mokho-te, matev eqeieqei namba ndønøfeap. <sup>2</sup> Zo poev zøgó. Geté zo gigiap o matev upøgimáv. Yaq zo ezoqa pakhapakha zozø-khaneám. Zo gigiap zøte-nønguvupatún. Geté kopømba mbaín tozo-upøgim. Yaq zo qaqa zogootún neka vozø-nøfe:patun. Zo gigiap neka matev mbain tøzømbegó ndøgo: Zo Mbumbukiam-te viimáv. <sup>3</sup> Neka qazo-vi:matun, zo gigiap o matev upøgimáv. Zapa ndøgo, zoqa matavap eqeieqeí mbá. Zo Mbumbukiam-te, ta-mba nqánek qazøte-vi:matún, av zoqa poev gigiap-te o matev-te ndøzømbe:go.

<sup>4</sup> Zo mambe ezoqam-qa zøteqeiví. Zo Mbumbukiam-te tøkebeáv. Gê, zo møzøté-zøtez? Zo manqe-i-qape matev-gi zifuap tozogoat, yaq zo

Mbumbukiam-gí qaqa ezoqám. Unimanqatín. Gekha ezoqám ndego, nqanek manqeí-qape matev namba, nøfu matev-qa ndego, ndego møndømø-Mbumbukiam-gé-qaqa-ezoqam-év.

**5** Mbumbukiam-qa Manqat, áv qane-manqaté nqægo, “Nqova ndego, ni mokho-te gu-utav, tege mba begó. Neka ndego ova ndømanqaté, teqa yaq-te.” Ge zô, ndozo-matavap, nqanek manqat, khokhō segē-peawap? Av taoká. **6** Geté Mbumbukiam ni kuku matev nøme mba nimbo-etøomít. Taqa yaq-te, Mbumbukiam-qa Manqat, áv qane-peawáp nqægo,  
“Ezoqa ekeza iz ndi-eqawat, Mbumbukiam, gèvøozoát.

Geté gekha ezoqám ndigu, ekeza iz ndivoat, Mbumbukiam kuku matev zø-etoám.”

**7** Yaq nakémbá, zo Mbumbukiam-qá mokhoté qanu:gú. Geté nqova soqaqape, gèmbøe-khakhazám. Yaq ndego gévuáo. Segéziváz. **8** Zo Mbumbukiam-té qanø-khanøgím, yaq ndego zo-te vøndó-khanøgím. Zo manqa-zapazapa-us ezoqam, zo ande zenda khavim-us ndøzøgo, vøsungúz, neka matev soqøsoqa, zitá qane-wuøém. Neka zo matavap keambap ezoqam, zoqa matavap soqøsoqa, vø-ivøvém, matavap kopo vøndapem. **9** Zo mutøkhop ndøwaním, zoqa manqa-zapazapa zapaya. Gè:-eivám, neka osombo vøwan. Zoqa otam nandav, bø-enénd, bemø-eiv, neka zoqa khanakhanakh, bemø-mutøkhop. **10** Zøkeza kha, Evezøza-qa bugug-te, zóvoatát. Yaq ndego zo ndø-eqagím.

*Ezoqa nøme, bizi-gevezðåt*

**11** Nøfuap! Zo izuzu manqa ndøgevèäm. Gekha ezoqäm ndego, Kisten zifu-qa yaq-te, soqa manqat nde:manqate neka ndégevèiwät, ndego soqa manqat, Mbumbukiam-qá guguna manqat-qá yaq-té gene-manqaté neka ndégevèwät. Geté qo Mbumbukiam-qa guguna manqat toqo-gevea, qo ambá av nqægo, qombopaëv. Geté qo sòqo-gevewät. **12** Guguna manqat etoam ezoqam neka manqa ovøyam megeat ezoqam kopo mba me:gó. Mbumbukiám. Ezoqam ndégo, kopømba ndego, ezoqa tekhandi:v o vøngiū. Geté qo gekha ezoqäm, ezoqa nøme toqo-geveiu?

*Ni bizi-khambuváp*

**13** Zo ezoqam, zo ndozo-manqate, av nqægo, “Nqægo khaiya o qasun, ni taon nøme-té qazinñiav. Viav kopo siziyyagät, bisnis vizimó-goném, neka yaq-fia kandambaqape vizimó-qasém.” Zo av ndøzøte-manqate, gèndoyogé. **14** Zo zøtezateáv, qasun ande gekha matev me mé:fakhän, neka zoqa yage, ande áv khanégoät. Gèmbo-mataváp. Zoqa yage, andé khøifakhøifa me me:gó. Sègefakhanín, neka sa vømø-navøemin. **15** Yaq nakémbá, zo áv qane-manqaté, “Evezøza poev tømbogoat neka ni vizíyyagät, yaq ni matev ndøgo tizígoném, av nqazi:-matavap.” **16** Zo zøtekambuváp, ndozo-matavap, av nqægo, zo kopømbaqapé, sa tozo-matønumat, av ndøzømbøepøoat. Geté khambuvap matev av nqægo, soqaín.

**17** Gèmbo-mataváp. Gekha ezoqām ndego, te-otev av nqægo, gekha matev eqeieqeí ndøgo, tego, getē ndego goneáv, te-te ndego, matev av nqægo, manqa-zapa-ús.

## 5

### *Guguna manqat, gigiap kopoav ezoqam-te*

**1** Yaq ndakin, no zo gigiap kopoav ezoqam nøzø-manqaté. Gèndoyogé. Zo gè-eivám neka gèzøgeæz. Zapa ndøgo, viniv kandambaqape zógeáv. **2** Zoqa gigiap kopoav, khokhó sege-lanqavét neka zoqa ndabua, khotet mba ndølogét. **3** Zogi moni neka auli gigiap fia kandakanda, nagi mba ndøvøtæmét. Taqa nagi, áv qane-ovøyám nqægo: Zo nqanek gigiap-te ezoqa nøme tøkemav ndøgo, zo manqa-zapa-ús. Taqa nagi zoqa kha andé góinam me mé:sonqotáv. Vaev khøuwa avønín. Geté zo gigiap-qape, sà tozonø-mendeomít. **4** Ezoqam ndigu, khae-te gizø-sasaetam, zo zòzømbe-khavozumám. Fia etoumáv. Nqáe! Zoqa matev nandav, andé Mbumbukiam me mbøe-akhayám. Ndigu ezoqam, khae-te gizø-sasaetam, tiqa akhayam, Evezøza Bazaføgakh-qape-qá gea-té qanø-oé. **5** Zo nqanek manqeí-qape-te, gawap kandambá qazøgoam, neka gekha matev ndøgo, zo qazø-poein, zo sòzo-gonemín. Kopømba ande av bøsik toqote-okefet, atema vømø-enaq-sakha-mba-ëv, sasa qólavaö, zo zøkeza kha áv tøzøte-okefé, zoqa zitøge khøuwa nonqo. **6** Zo ezoqam eqeieqeí, manqa ovøyam-té qazonø-áb,

vozōzitag, vōpakhaez. Geté ndigu zo-te yaq qavøiwateáv.

*Matev føgøføgakh ambá qabete-fakhanám, geté ni até bizi-waniáp*

<sup>7</sup> Nøfuap! Sozotó-kewagát, atema Evezøza betøndōqavan. Nqáe! Zo avøe ogekhæm ezoqam-qa matev mbomataváp. Avøe gigiap gi-ogeakhin, yaq sogó-kewagát, atema avøe gigiap mbomømboma vøkhatøkhatoamín. Ndigu møndæzotéz. Qæ bøtøkhæ-lanqavøém, qæ ndøgo, manqeí menegim nonqo, neka qæ nøme ndøgo, avøe umivøem nonqo. Yaq sogó-kewagát. <sup>8</sup> Até zó-a, sozotó-kewagát, neka føgøføgakh ndøwaniáp. Zapa ndøgo, Evezøza-qa qavøne khøuwa, avønín.

<sup>9</sup> Nøfuap! Zo manqa ndøpønqðm, yaqyaq-a. Soqain ndøgo, Mbumbukiam zo manqa ovøyam-te te-ab. Nqáe! Ndego manqa ovøyam ezoqam, avønín géfakhán. <sup>10</sup> Nøfuap! Evezøza-gi manqa vevezam ezoqam zømataváp, ndigu teqa iz-te, manqat gimanqatam. Zo tiqá matev mbopáev. Ndigu matev føgøføgakh ambá giniqeivám. Geté føgøføgakh sekembá sege-waniapám. <sup>11</sup> Nqáe! Ni ezoqam ndigu, føgøføgakh giwaniapam, khanakhanakh-us nitizæzá. Zo Zob-qa yaq-te, mòzoyogém. Ndego matev føgøføgakh, ambá geneqeivám. Geté ndaføyambá segeyám. Neka zo mòzøte-zøtéz: Vaev-te ndøgo, Evezøza matev mbomømboma mbogó. Zapa ndøgo, Evezøza kuku neka tanakh kandambá.

<sup>12</sup> Nøfuap! Gigiap-qape nqánek: Zo

**5:7** 5:7 Jer 5:24; Deut 11:14    **5:8** 5:8 Lom 13:11-12; 1 Pita 4:7

**5:11** 5:11 Exo 34:6; Job 1:21-22; 2:10; Psa 103:8    **5:12** 5:12 Met 5:34-37

manqat tozo-manqatat, zo zenda ndø-eqàgim, Mbumbukiam-te. Neka zo yan-qa iz o manqeiape-qa iz o gekha gigiap nøme-qa iz, ndøvèwám, zoqa manqat bazafögakh etoam nonqo. Zoqa manqat, unimanqatin mba begó. “Ya” tozo-manqatat, yaq “ya” begó. “Mbain” tozo-manqatat, yaq “mbain” begó. Soqaín ndøgo, zo Mbumbukiam, zoqa manqat zapaya, manqa ovøyam-te te-ab.

### *Guligulim-qa bazafögakh-qa yaq-te*

<sup>13</sup> Zo mokho-te, ezoqa nøme viniv tømbogoat, ndego yà beguligulím. Neka ezoqa nøme, khanakhanakh tendap, ndego Mbumbukiam-qa iz eqawat nonqo, ouv beqaqaeám. <sup>14</sup> Zo mokho-te, ezoqa nøme enqoni tendap, ndego Kisten megetapak-te, manqat behhofotáv. Yaq ndigu bëtøndozáv, bembō-guligulimem, neka Evezøza-qa iz-te, oil bembøē-qouzumem. <sup>15</sup> Yaq tiqa guliguli manqat, unimanqatin matev-us tiguligulimem, ndego enqoni ezoqam, gékhakhæv. Evezøza gembótöké, vø-itān. Neka av ndego manqa-zapazapa ge:goam, Evezøza segembøé-navøém. <sup>16</sup> Yaq nakémbá, zoqa manqa-zapazapa, yaqyaq-a é-mozo-vøndøyám, neka yaqyaq-a vøe-guligulim. Yaq zo tøne-eqeieqeíez. Zapa ndøgo, ezoqa eqeieqeí-qa guligulim, taqa bazafögakh kandambá. <sup>17</sup> Ilaiza mbovatáp. Ndego ezoqam até kopó, av ni nqazi:gu. Bazafögakh-us geguligulim, av nqægo, Izrael manqeit-te qæ belanqàvøém, yaq qæ lanqavøepøteáv. Viav

misiká neka løvøyak síks, qæ lanqavøepøteav qagoam. **18** Yaq nango geguligulim, av nqægo, qæ bølanqavøém, yaq qæ sège-lanqavøém, neka kopømbá, avøe gigiap nango qa-umivøem.

**19** Nøfuap! Zo mokho-te, ezoqa nøme unimanqatin manqat te-ivav, nakhoa nømete vøwåv, zo ndego nango nakhoa eqeieqei-té qamøndo-khatowém. **20** Gèmbo-mataváp: Gekha ezoqám ndego, ezoqa nøme, nango nakhoa eqeieqei-te tekható, ndego ngenek ezoqam løvøte-té gendó-khandí:v. Yaq Mbumbukiam teqa manqa-zapazapa kopoav-qape, gembó-matavapák.

**Mbumbukiam-qa Manqat Mbomambaqape  
Ruth, Jonah, and the New Testament in the Kuni  
dialect of the Kuni-Boazi language of Papua New  
Guinea  
Rut, Jona, na Nupela Testamen long tokples  
Kuni-Boazi long Niugini**

copyright © 2015 Wycliffe Switzerland

Language: Kuni-Boazi

Dialect: Kuni

Translation by: Wycliffe Switzerland

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-08-20

---

PDF generated using Haiola and XeLaTeX on 11 Nov 2022 from source files  
dated 18 Oct 2022

f10a11c4-6a0c-5775-9168-c6e73df1a68f